

UUM ONLINE: **TUGAS** membangunkan pelajar secara holistik mencakupi usaha-usaha seimbang antara nilai akademik dan kerohanian selaras dengan hasrat Naib Canselor Universiti Utara Malaysia (UUM) Profesor Datuk Dr Mohamed Mustafa Ishak dalam Teras Strategi Kedua di majlis Amanat pada tahun baru lalu.

Sehubungan dengan itu, Pusat Islam UUM melalui Unit Latihan dan Pendidikannya telah menganjurkan program Imam Muda untuk 35 pelajar Sekolah Menengah Kebangsaan (SMK) Tanjung Pauh, Jitra, Kedah, baru-baru ini.

Penyelaras program Ustaz Ahmad Zabadi Mokhtar ketika ditemui berkata, pelajar sekolah dipilih selaras dengan hasrat Naib Canselor untuk mendekatkan pelajar UUM dengan masyarakat setempat dan memasyarakatkan kampus ini.

Manakala, bagi siswa UUM pula program seperti ini bukan sahaja dapat mengasah bakat kepemimpinan mereka malah dapat menjalinkan hubungan dengan pihak luar.

"Pendedahan dan peluang dalam program seperti ini dapat memantapkan bidang komunikasi dan kepemimpinan antara kami sekaligus dapat seimbangkan bidang akademik dan kerohanian," ujar Pelajar Program Pengurusan Kerja Sosial, Khairil Amar Norhan.

Katanya pembabitan dalam program seperti ini memberi peluang kepada golongan siswa untuk membimbing pelajar sekolah dalam bidang kerohanian, kefahaman dalam fardhu ain serta sembahyang sambil menjalinkan hubungan antara masyarakat di sekitar kampus ini.

Manakala, bagi pelajar SMK Tanjung Pauh, Mohd Zuhairi Ishak ketika ditemui berkata, peluang untuk mendapat bimbingan dengan siswa UUM ini amat bertuah kerana mereka bukan sahaja dapat membimbing dalam bidang kerohanian malah turut memberi semangat kepada peserta untuk melanjutkan pengajian hingga ke peringkat menara gading.

"Saya berharap jalinan hubungan dengan Pusat Pengajian Tinggi seperti UUM ini akan memberi manfaat bukan sahaja dalam membantu pelajar dalam program seperti ini malah membuka minda pelajarnya bahawa di Institusi Pengajian Tinggi juga menekankan nilai kerohanian, akademik dan kepemimpinan secara seimbang," kata Penyelia Petang sekolah itu, Mohd Asri Man 47, ketika menutup dan menyampaikan sijil di majlis itu.

Beliau yakin dengan sesi ceramah, latihan secara berkumpulan, bimbingan dalam pembacaan yang betul dalam sembahyang, kefahaman dalam fardhu ain dan menanamkan semangat untuk mereka menjadi insan yang berguna kepada agama, bangsa dan negara akan menjadikan mereka lebih bersedia untuk menjadi pemimpin di sekolah seperti yang diharapkan.

Katanya, pada peringkat permulaan ini hanya 35 pelajar dipilih dari kalangan tingkatan satu dan dua sahaja dengan harapan mereka ini akan dapat dibentuk dan dijadikan mentor kepada pelajar lain.

Program selama dua hari yang diadakan di surau sekolah itu dibimbing oleh barisan fasilitator dari Unit Latihan dan Pendidikan Pusat Islam UUM.